

BERITA HARIAN 17/10/2014

## UniSZA komersialkan madu tualang



Pencari madu lebah tualang mula memanjat pokok pada program kembara bermotosikal mencari madu tualang Jerteh.

[FOTO SYAHIRAH ABDULLAH/BH]

**Kuala Terengganu:** Institut AGROPOLIS Universiti Sultan Zainal Abidin (UniSZA) berhasrat bekerjasama dengan pencari madu lebah di Besut untuk mengkomersialkan madu tualang di bawah jenama 'Madu Tualang Jerteh'.

Timbalan Naib Canselor (Penyelidikan dan Pembangunan) UniSZA, Prof Dr Mohd Ekhwan Toriman, berkata pihaknya yakin produk itu mampu mendapat perhatian kerana madu tualang Jerteh memang terkenal dengan pelbagai khasiat.

"Jika dikomersialkan, ia dapat membantu meningkatkan ekonomi pencari madu di daerah Besut. Kampung Pasir Akar dikenal pasti bagi merealisasikan program ini, manakala AGROPOLIS UniSZA menjadi hab kepada kajian saintifik lebah madu di negara ini," katanya.

### Anjur kembara

Mohd Ekhwan berkata, pihaknya dengan kerjasama UniSZA B-(Bikers) Care turut menganjurkan program sehari kembara bermotosikal mencari madu tualang Jerteh, disertai penduduk setempat serta 29 penunggang motosikal berkuasa tinggi dari daerah ini, Besut, Selangor, Negeri



Mohd Ekhwan (empat dari kiri) bersama peserta program kembara bermotosikal mencari madu tualang Jerteh **menunjukkan madu tualang yang berjaya diambil**.

Sembilan dan Putrajaya.

"Pelbagai aktiviti diadakan, antaranya taklimat dan demonstrasi mengambil madu tualang oleh pemanjat serta kaedah membela lebah tualang. Peserta melihat sendiri bagaimana madu tualang diambil di hutan walaupun penat selepas berjalan kaki selama satu jam setengah meredah hutan simpan Jerteh," katanya.

Sementara itu, pencari madu tualang, Yunus Ismail yang berpengalaman hampir 20 tahun dalam bidang berkenaan, berkata musim ini, bilangan sarang untuk setiap pokok boleh mencapai 30 hingga 60 sarang yang boleh menghasilkan sehingga 20 kilogram madu setiap pokok.

"Satu sarang boleh dituai madunya sehingga lima kali dalam tiga hingga empat minggu. Madu ini menjadi tarikan utama dan mendapat permintaan ramai kerana khasiatnya. Harganya boleh mencecah RM80 sekilogram," katanya.